

臺灣文獻史料叢刊——第六輯

南 天 痕
(全)

臺灣大通書局印行

臺灣文獻史料叢刊

第六輯

南
天
痕
(全)

臺灣大通書局印行

臺灣文獻叢刊第七六種

南
天
痕

凌
雪

自序

或曰：南天痕者何紀？弘光、隆武、永曆三朝事也。何以不言朝？季野所謂「不成朝」也。何以不名史？次公所謂「不敢當史筆」也。何以謂之「南」？晒園所謂「皆南土也，勢不及乎北也」。何以謂之「天」？蒼水所謂「天之所興、天之所廢，不得而知也」。何以謂之「痕」？落泉所謂「明天留纖痕」、心齋所謂「清天掛一痕」也。嗚呼！宇圻寰傾，碎封疆於銅馬；綱頽紀裂，倒風教於金甌。政令互更，攻守紛錯；薇里所謂「興亡成敗得失之痕繼煤山」也。至於紅霑半野，赤灑孤城；嚙舌賊營，斷頸帝舳；礮齋所謂「血痕閃閃」也。震軍旗於險麓，走戰艘於狂濤；骸裹貂衣，屍橫馬革；半巖所謂「怒痕盆起劍痕鮮」也。酷吏覆盆，痛網雲之箭蠹；兇徒側刃，傷挽日之戈殘；履菴所謂「悲痕深、刀痕赤」也。生理甘餓，啼恨何言！脫身逃禪，含冤不吐；漸岸所謂「窮山冷澤中淚痕斑斑」也。以及雁鴻影落，殞百戰之弟兄；鸞鷺形凋，作九京之夫婦；賢賓死幕，義僕殉家；合族捐軀，全門致命；柳堂所謂「蠹痕落落、忠痕纍纍」也。若夫狐媚虎噬，慘成白骨青燐；鼠附狼奔，弄得神號鬼哭；賊戕君而莫救，臣賣主而乞憐；鹿田所謂「花痕在腹、醜痕在臉」也。嗚呼！英魂毅魄，氣奪山河；辛口柔腸，腥貼日月；事變愈繁，情態畢露；可以焚香、可以按劍、可以裂眚、可以怵舞、可以慟流

涕者，梨山所謂「對南天而飲恨」也。

是編也，論賢知寧嚴；公紀所謂「世所指名」也。寬庸流弗議，以其無所責焉矣；鶴灘所謂「哀之非恕之」也。君父之隱，隱而不彰；希齋所謂「愚賤勿敢知」也。亂臣賊子，末路必載；羽菴所謂「示誅夷以戒萬世」也。纂之者誰？靖節所謂「不知何許人」也。何以不書姓？莧石所謂「諱之」也。何以不書名？文堅所謂「微之」也。何繫以號？所謂「作史書氏志不忘」也。或曰：是殆取乎「文信國南天痕」之句也。

西亭凌雪撰并書。

評言

晒園嘗論明之亡也，始於羽黨，成於奄豎，終於盜賊。南渡繼之，小人得志，借朋黨以肆毒，合奄豎以固寵、假盜賊以張威；而廟堂昏庸，酣歌勿恤；忠貞黜落，貪黷橫肆；紀綱倒置，是非混淆；以致穴中自鬪，貽敵以漁人之利焉。思文賢主也，幅員偪仄，倚寇召寇；永明仁慈有餘，英斷不足。崎嶇山海之間，播遷流離；收遺孽爲腹心，託絕域爲禁籞；傷已。當其時，坐而平章者，不乏道德譽望、忠諒誠悃之儒；其捍禦邊圉、綢繆外海者，亦多英達敏練、遺艱投大之材。劉、黃、姜、高、史、瞿、何、堵諸君子者，皆學究天人、忠貫日月，常變不渝，文武互濟，亦可謂祖宗之留遺王國之楨矣。乃好爵虛糜，大權不畀，或外而不內、或尊而不親，終於一木支傾、丸泥塞潰，碧血青燐，抗忠自信。悲夫！悲夫！天命不延，人慮再舛，百六之會，又焉能逃？

迨夫曆數已終，正朔永絕，而監國猶然樹蠹島嶼之中，抗顏鯨鯢之側，落日狂濤，衣冠聚議。寸疆未復，而志不衰；大命垂盡，而氣方壯。父叛子忠，鴟音忽好；懷誠思烈，不敢萌貳；雖新王之封冊、嚴父之危詞，不能易焉。延祚再世，歷年三紀，然後知三百年詩書禮樂之遺澤，其導人忠義之教者深矣。

蓋明之積弊約有三端。一曰：務虛名不採實用。高談性命，而以農田軍旅爲粗；研

志詞華，而以刑法錢穀爲俗。致使吏治不修、武備全廢，假鉞於武夫、待成於胥吏。一弊也。二曰：別流品不求真才。古之求士，或在草澤、或在山林，甚至羈囚餓隸、烽卒仇夫，皆列置疆聯、畀膺寵任，未聞同朝之謗。今乃獨尊甲第、鄙棄舉貢，卽材懷管葛、行同夷惠，陞擢無期，排擠有自，楚材晉用，誰實貽之！二弊也。三曰：爭浮文不念切效。承平虛夸以抗大敵，祖訓浮言以揖巨寇；欲以通和，而反樹之怨；欲令效忠，而滋蔓之怒。迨至隣封執言，狂寇反噬，則影銷烟散，啞口無策。三弊也。積此三弊，敗亡不悟；誤國之罪，豈得獨諉之小人哉？余所以每不禁掩卷而三嘆也。

嗟乎！舊國舊教，望之悵然。況乎姓氏與開業並垂，爵命與末流俱隕？其始其末，先臣實式馮之。俯仰今昔，廻環感慕，不知涕泗之何從！自附於「西臺之紀」云爾。西亭凌雪書。

例言

一、國家鼎革，事故煩多。金陵、閩、粵諸君，播遷三所，歷年二十；「明史」附入「懷宗」，紀載寥寥。野史無刊本，日就零落；後人有舉隆、永之號而茫然者。余因網羅散佚，搜抉殘蠹。上自朝廟大綱，事關興滅；下迨閭巷幽貞，誼存感諷；紀人傳事，本末具見焉。攢簇成章，刪繁歸雅；非作名山之藏，聊補正史之缺。

一、國家興廢，何代無之！抗顏逆行，伏尸都市者，雖令甲之罪人，然各爲其主。凡在興朝，不得已而遂其志耳。對干表容，贈通紀闕，歷代相沿，著爲美談。我朝定鼎，褒殉難諸臣，且開史局時，已奉有「野史送部、不以忌諱爲嫌」之令矣。採而輯之，直書正筆，悉遵令典。

一、野史中有兼紀三朝事者，吳偉業「綏寇紀略」、鄒漪「明季遺聞」、溫睿臨「南疆逸史」、錢謙益「三史備言」、周容「明季綫」是也。有紀國變及南渡事者，夏允彝「幸存錄」、文秉「甲乙事案」、許重熙「甲乙彙略」、錢光繡「南渡紀事」、李清「三垣筆記」、楊秉燧「南渡紀略」、史逸裘「南江藏史」是也。有兼紀弘光事者，顧炎武「聖安本紀」、黃宗羲「弘光實錄」、李清「南渡錄」、周明新「南渡續集」、董劍鏗「南渡紀」是也。有兼紀弘光、永曆兩朝事者，黃宗羲「行朝錄」、錢秉鐙「所知錄」、瞿昌文「天

南逸史」、劉湘客「行在陽秋」、高斗魁「徵信錄」、魏禧「存信編」是也。有專紀隆武事者，閩人「思文大紀」、鄭雪昉「隆武略」是也。有專紀永曆事者，沈佳「存信編」、魯可藻「嶺表紀年」、劉湘客、楊在、綦毋邃「象郡紀事」、馮甦「劫灰錄」、某「南粵新書」、「粵事紀略」、鄧凱「滇緬紀聞」、「滇緬日記」、吳爾堯「滇緬事略」、林時躍「粵事徵信編」是也。有專紀一人一事者，應廷吉「青燐屑」、史德威「維揚殉節始末」、袁繼成「潯江紀事」、某「北使紀」、康范生「虔事始末」。某「贛州乙丙紀略」、釋慧潭「真珠載」、徐世普「江變紀略」、王言儒「潯江藏本」、郭寒「乙丙事蹟」、章曠「楚事紀略」、李世熊「木嘆記」、沈荀蔚「蜀難叙略」、王玉書「吾徵錄」、鹿儒方「徐徐集」、田壁川「蜀難始末」、楊在「朱容藩亂蜀始末」、「武岡播遷始末」、「孫可望脇王始末」、「犯闕始末」、「安隆紀事」、鄧凱「遺忠錄」、「求埜錄」、李文胤「可考錄」、黃百學「莫言錄」、丘來章「鏡信錄」、周元初「安隆紀事略」是也。有專紀魯監國事者，黃宗羲「魯紀年」、「四明山寨記」、「舟山興廢記」、「日本乞師紀」、高斗權「海疆紀略」、黃宗炎「存疑集」、馮京第「浮海記」、鮑澤「甲子紀略」、溫睿臨「海邦彙略」、徐鳳垣「且存錄」、張煌言「四明紀事」、全枋「江東泣血錄」、陳睿思「閩海見聞紀略」是也。至萬季野「明末諸傳」等書、呂晚邨「明季紀事」等書、徐閣學「明季忠烈紀實諸傳」等書以及諸名家已刻未刻文集外紀等書，共九百七十四種。其間紀載有詳略、年月有先

後、是非有異同、毀譽有彼此，合而訂之，正其紕繆，補其缺遺，以成是編。其他未見之書，尙俟再考；然大略已具是矣。

一、古史於皇帝則稱本紀，諸臣則稱列傳者。紀舉一時政令大綱，列傳止載一人一事，故稱紀以別之。然太史公於項羽，亦稱本紀；以其號令一時，事多詳載也。今金陵、閩、粵三君，位雖不終，亦自帝其地；各有政教，理合紀載。若拘入「懷宗」之例，則傳且不列，何有於紀？非一代史體也。茲首卷先紀略，不稱本紀者，避本朝也；其言略者，事固不得而詳也。

一、古人作史，有專傳、有合傳、有附傳，非以人有優劣也，事有煩簡耳。專傳必其行跡之衆多者也。合傳則其學同、其言同、其時同、其名同、其一事偶同。老、莊、孟、荀，其學同也；刺客、遊俠、酷吏，其行同也；張蒼、申屠嘉，其官同也。婁敬、叔孫通，其時同也；管、晏，其顯名同也；屈原、賈誼，以放逐一事偶同也。至附傳者，以其人事跡少不能成傳，故附記之，非薄其人也。是編諸傳，竊倣此意；以事、以人爲類，或其人人品相懸，亦不及計矣。

一、明立宗支幾百萬，殲於賊者十之九焉。其散處地方，義旅相與擁戴。於是，知列聖德澤在人，念其苗裔猶祖宗也。惜乎謫劣之材，不足以勝鼎器，隨起隨仆，比之孟公益子，猶或下焉；被其毒者，至儕之盜賊。嗚呼！夫孰非天潢之支流也歟！仇在君親

、禍及宗祖，枕戈之志，孰得議之！雖其無成，亦足以悲矣。而兵火之餘，無從掇拾之者；謀略不具，始末不完，聊志梗概，存其間抱節義者爾。

一、諸臣有逮事崇禎者，其行事章奏，悉略之。以其所重在南渡後，且已載於「明史」也。必列之者，以其終事在後也。然大節亦撮數語，不敢盡遺也。

一、諸傳之叙，先金陵、次閩、次浙東、次粵。諸臣有歷事三朝者，則從其重者次之。呂大器終於粵而先之者，迎主異議，大器爲主，一朝之眉目也；後在粵，亦無所表見。

一、古人附傳，例不列名；余獨不然。蓋惜其人忠義節烈，本屬賢者，而行事泯沒，無可紀載，僅以一死成名。若復不列其姓氏，則觀者且將忽之；故每篇大書特書，令人聳然於賢者之名耳。若其人本不足重者，雖附載不列名也。

一、徐閣學「忠烈紀實」，雖其人無事可書者，必另列一行，大書姓名；余則不然。彼專紀忠烈，無可附書；余則一朝之人，忠佞奸賢悉列焉。間或附見，豈能掩其人之忠烈哉？此所以異也。無行事而但列姓名以爲一傳，古無此體也。

一、義士義兵等傳，古無其名，今無昉乎？曰：無害也。夷齊扣馬而太公稱以義士，出自興朝佐命之口，非出自勝國也。況諸史各有忠義傳，在勝國者爲忠，則在興朝爲不忠；在勝國者爲義，則在興朝爲不義。然史皆興朝所修，而必不廢忠義之名者，存其

實焉耳。此之立名，猶是義也。

一、或謂黃陶菴學淳文高，「明史」置之儒學，侯通政司、沈總督、丘巡撫、揭傅兩太史、曾吏部等皆官位尊重，子乃與方都司、茹參將等武夫並列義兵，其間更有布衣仗義者俱在焉，得毋不倫乎？余曰：固哉，子之見也。夫名位有貴賤，忠義無貴賤也；能忠義則匹夫貴矣，不能忠義則卿相賤矣。漢人所謂「桀紂至貴而下士羞與爲伍，夷齊至賤而王公不敢與抗」是也。豈在名位哉？郎之戰，公叔務人與鄰童汪錡往偕死焉。魯人欲勿殤汪錡，問於仲尼，仲尼曰：能執干戈以衛社稷，雖欲勿殤也，不亦可乎？夫童子也，而其名與國君之子並垂；魯人禮之、聖人贊之，千載下凜凜有生色，較之魯三卿猶烈焉。非以其死義耶？而何不可並列之有！至如道學，正於舍生取義見之。陶菴以一書生枕戈寢干，與武夫並奮，此正見其實在道學也；與夫口談仁義，而身怯國事者異矣。嗟乎！世衰道失，學術不明，人惟聲利是趨，乃於綱常大義亦先上名位，豈不可嘆哉！

一、周鏞、周鍾、雷演祚三人者，未嘗官南渡也，南渡殺之耳。何傳焉？曰：是南渡一大案也。馬士英竭智盡巧以起大鉞，而歸其獄於從逆諸臣；從逆者不可得而誅，而歸其獄於周、雷。於是，周、雷誅，大鉞用，清流懼禍，釀成左鎮之內犯，而國已亡。則此三人者，烏乎不載也？

一、四鎮，同功一體之人也，列黃、高而削二劉，以其不終也；其事則已附見矣。

李成棟之附見於李元胤傳，以其無始也。成棟不與聲桓一例乎！曰：是有辨。粵中之不靖，成棟擾之也；迨其反正，而民生已塗炭矣，忠烈材幹之士已夷滅矣。惟其小心聽命，以死勤事，較之借內附而仍暴橫如忠貞諸人異焉。若夫聲桓，始終一賊耳；歸朝之後，不靖吏、不納土、不離窟穴，擅置官吏，私財賦、妄殺戮，稽其來後，全無王章，致煩天討，屠害生靈，故列逆臣。

一、孫可望事與粵中相始終，粵中立國而可望入滇矣，可望降而粵亦亡。且其邀王封、謀受禪、擅殺大臣、刼置安隆、稱兵內犯，皆粵事之大者，不載不可也。載之，則人歸降，例不得載。今詳見李定國傳而雜於同時諸臣，亦得其大略矣。

一、諸史必有儒學、孝友、獨行、文苑、隱逸、方伎等傳，茲編爲人無幾，無從分晰。獨隱逸欲列一傳，而搜訪殊寡。方明之末，諸潔身高蹈者，所在多有，然其人既不求名，而知交中或鮮好義文學之士，不爲傳述，子孫式微，遂致湮沒，豈不惜哉！廣搜旁羅，以發潛德，此亦四方君子之責也。

一、金陵之亡，閩有君矣；閩亡，粵有君矣。魯監國紀，不亦贅乎？曰：此以存諸遺臣也。諸臣之雜事唐、魯、桂者多矣，若錢、張諸公，與魯相始終者也。無魯，何以有諸臣？諸臣之雄才大略、精忠烈志，皆與日月爭光者，可以略乎？諸臣不得略，而監國烏乎不紀也？且閩亡之後，諸臣奉之長垣、奉之健跳、奉之中左、奉之舟山，閩中震

動；獨非國事乎？此皆不得附見於閩、粵者也。在昔梁未亡，而蕭譽自立爲後梁，史不得略。彼並帝者尙然，況與守監國之虛懷、無自帝之驕志，吾以爲賢於靖江、廣州萬萬矣；故彼削而此紀。

一、明祖鑒胡、汪之禍，不復立宰相，以庶政歸六部，而大權獨操，太阿不旁落，善矣。然後嗣難以遵也。成祖始興學士參決機務，設有內閣矣。英宗冲年踐祚，政在房闈，始有票擬矣。其後皆以六卿加宮保銜，則權與宰相侔矣。懷宗英察，微有猜嫌，秉鈞之地，信任不專，十七年之間至五十人，於是內豎得而箝制之、臺諫得而齟齬之，廟堂無政，海內崩離。豈非輕蔑大臣、有主而無輔之所致歟！南渡而後，貴陽煽虐，猶有承平權奸之勢，故江左卒爲所覆。至於閩、粵，而政府輕於庶官矣。片言合旨，立執化樞；節鉞邊帥，皆予闕銜。惟起二、三遺老，欲資籌策，而碌碌尸位，望不稱職；事不可遺，故立一傳。

一、鄭芝龍受明厚恩而不終，成功以子叛父，是何足誌乎？曰：凡爲傳者，豈其人爲？亦以徵國是焉。閩之立國，惟鄭是依，國事取決於芝龍，而負恩喪國，計其罪，合入叛逆之伍。成功痛父之不忠，矢心圖報，奉粵朔不敢有二。迨至粵亡，猶以紀年竊附，仍稱天復之義，明之世勳宗戚與夫將相大臣受累朝厚恩者，未有效忠若是者也。事雖不成，君子深悲其志焉。或曰：其拒魯王而不納，非欲自尊恣乎？曰：否。魯與閩固

不協也，兩相諂矣；閩亡而奉魯，思文有知，不含慍地下乎？附粵以明臣服之心，拒魯以存故主之感，此其英雄智略也。然則何以不入粵？曰：地相隔也。此有土焉，勢不得舍之以奉粵也。令舍而奉粵，則亦壬寅一俘囚耳；安能崛起島中，延明曆二十餘年哉！故以其父子祖孫，自爲一傳，如五代吳越世家例。爲忠、爲叛，讀者評之。

一、是編所以補正史，正宜記載軼事耳，乃往往略之。如德昌之疑非真也、大悲童氏之獄暗昧不明也，非當明辨之者歟？永明見繫而神告以貞符、入寺而木偶起立，非受命之貞乎？瞿留守之松仙預定也，非管、郭之流與？若是者不可枚舉，而子俱不載何也？曰：德昌之事，無從辨也；辨之而益疑，刪之而論定矣。永明之夢、松仙之數，近於機祥，君子不道也。此編外史也，不敢悖乎史體。若瑣瑣是述，疵纍筆端，故略之；略之，而人且以正史目之矣。

南天痕目錄

卷一

紀略一 聖安帝……………(一)

卷二

紀略二 思文帝……………(一五)

紀略三 永曆帝……………(二三)

紀略四 魯監國……………(三)

卷三

宗藩傳 朱盛濃、朱議瀝、朱盛澂、朱議漉、朱紹鯤、朱常棨、朱統錡、朱容藩(四)

卷四

列傳一 史可法(附應廷吉)……………(五三)

列傳二 高弘圖、姜曰廣……………(六八)

卷五

列傳三 張慎言、徐石麒、張有譽、解學龍、高倬、呂大器……………(七五)

列傳四 劉宗周、黃道周……………(六)

卷六

列傳五 左懋第、袁繼咸……………(九)

列傳六 黃得功、高傑、乙邦才、馬應奎、劉肇基、莊子固……………(一〇)

卷七

列傳七 周鏞、周鍾、雷縝祚……………(一九)

列傳八 劉成治、黃端伯、吳嘉胤、龔廷祥、陳於階……………(二二)

卷八

列傳九 凌嗣、何剛(附徐孚遠)、祁彪佳、陳潛夫、王瑞旂……………(二九)

列傳十 徐汧、華允誠、楊廷樞、劉曙、陸培、王道焜、葉向榮……………(三八)

卷九

列傳十一 金聲、夏允彝、陳子龍、沈廷揚……………(三五)

列傳十二 顧錫疇、何楷、路振飛、曾櫻、曹學佺、尹民興、吳聞禮(附郭

符甲)、艾南英、熊緯(附歐陽素)、張致遠……………(四二)

卷十